

Na sesión celebrada na data que se indica, adoptouse o seguinte

ID: 1330

ACORDO:

Na cidade de Ourense, a vintedous de marzo de dous mil.

Visto o expediente de clasificación do monte como veciñal en man común denominado "Mormoural", por solicitude dos veciños de Nocedo

Resultando que con data 30 de marzo de 1993, tivo entrada no rexistro da delegación provincial da Consellería de Agricultura, Gandería e Montes en Ourense, escrito dirixido ó Xurado Provincial de Montes Veciñais en Man Común asinado polos veciños de Nocedo, Concello dos Blancos (Ourense), solicitando se declare o monte "Mormoural" como veciñal en man común.

Resultando que en datas 1 de abril de 1993 e 4 de febreiro de 1994 requiríselle e reitéraselle ós interesados para que completen a súa solicitude inicial aportando plano topográfico, lindeiros e superficie aproximada.

Resultando que o Xurado provincial en sesión celebrada en data 12 de xuño de 1996, acordou tomar en consideración o citado escrito e inicia-lo expediente de clasificación do monte designando instructores do mesmo a d. Abel Carvajales



Santaefemia e a d. Manuel Bouzas Costa, quenes aceptaron tal cargo, librándose mandamento para a anotación preventiva no Rexistro da Propiedade do Carballiño, e remitíndose comunicacións dirixidas: ós veciños do lugar de Nocedo de Ribeira, ó Ilmo. Sr. presidente da Deputación provincial de Ourense ó Sr. Alcalde do Concello dos Blancos, á Consellería de Política Territorial, Obras Públicas e Vivenda, e ó xefe do Servizo de Montes e Industrias Forestais, á Confederación Hidrográfica do Norte, ó Sr. xefe do Servizo de Estructuras e Desenvolvemento Rural, á Xerencia territorial do Catastro e ó xefe do Servizo de Extensión Agraria, publicándose edictos no Diario Oficial de Galicia e no taboleiro de anuncios do Concello dos Blancos, durante o prazo dun mes segundo consta en dilixencia estendida ó dorso do edicto polo secretario do citado concello, que durante o prazo sinalado en edictos para que os interesados poidesen comparecer ou intervir nel, en defensa dos seus dereitos, non consta presentada ningunha alegación.

Resultando que a anotación preventiva de iniciación do expediente, practicouse no Rexistro da Propiedade do Carballiño, como segue:

Anotación A, da leira nº 7.368, ó Folio 75, do Tomo 679, Libro 33 dos Blancos, na que queda inscrita anotación preventiva a favor dos veciños de Nocedo de Ribeira.



Resultando que en data 14 de xuño de 1999 o Servicio de Montes e Industrias Forestais remite informe sobre o límite sur do monte no sentido de: termo municipal de Baltar e monte veciñal en man común de Tixós, e precisando que na extrema oeste o bosquexo presentado polos promotores non inclúe unha porción de superficie consorciada que suponse parte do mesmo mapa.

Resultando que na tramitación do expediente cumpríronse tódalas formalidades legais.

Considerando que o Xurado provincial de Clasificación de Montes Veciñais en Man Común, ten xurisdicción e competencia para coñecer los expedientes de clasificación dos montes que teñan tal carácter a teor do establecido no artigo 9 da citada Lei.

Considerando que o tipo de comunidade xermánica que institúe a Lei de Montes Veciñais en Man Común ten como características esenciais as seguintes: 1) Que os condominios únense por vínculos persoais de vecindade agrupados en parroquias, aldeas, lugares, casaríos ou barrios non constituídos formalmente en entidades municipais; 2) Que polo tanto o número de titulares é variable e indeterminado; 3) que o patrimonio colectivo é utilizado e aproveitado polo veciño, en canto membro da agrupación veciñal, faltando a idea de cuota no sentido xurídico-romano; 4) que o patrimonio e a participación é inalienable, imprescritible e inembargable; e 5) Que os montes veciñais en man común son de titularidade pública e de uso común.



comunidade é indivisible, non podendo os comuñeiros pedi-la "actio communi dividundo"

Considerando que segundo informacións e testemuños resulta que os montes citados son aproveitados e posuídos en réxime de comunidade xermánica polos veciños da parroquia de Nocedo , no Concello dos Blancos

Os datos do citado monte son os que se referencia na parte dispositiva deste acordo.

Considerando que das informacións recollidas resulta que os veciños de Nocedo , están conformes coa clasificación do citado monte como veciñal en man común, incluída a porción sita no extremo oeste que está consorciada coa Administración Forestal, quedando acreditado en período de instrución o seu carácter veciñal

Considerando que a teor do disposto na Lei de Montes Veciñais en Man Común, o expediente de clasificación iniciouse por acordo do xurado, a instancia dos veciños de Nocedo , para que este xurado puidese acordar a iniciación do expediente de clasificación.

Vista a Lei galega 13/1989, do 10 de outubro, de montes veciñais en man común e o seu Regulamento, o Decreto 260/1992, do 4 de setembro , así como o establecido na Lei de réxime xurídico das administracións públicas e do procedemento administrativo común, do 26 de novembro de 1992, modificada pola Lei 4/1999



Visto o Decreto 482/1997, do 26 de decembro, polo que se establece a estrutura orgánica da Consellería de Medio Ambiente.

O Xurado provincial de Clasificación de Montes Veciñais en Man Común, á vista dos antecedentes e fundamentos expostos e por unanimidade dos seus membros:

ACORDA:

Primeiro. - Clasifica- lo monte denominado "Mormoural", de 59 ha , aproximadamente en conxunto, de superficie a favor dos veciños dos lugares de Nocedo e Noveas (parroquia de Nocedo), no Concello dos Blancos, e cos datos que a seguir se relacionan, coma veciñal en man común, en réxime de comunidade xermánica.

Os datos do citdo monte son:

Concello: Os Blancos.

Monte denominado: "Mormoural".

Comunidade propietaria: Veciños dos lugares de Nocedo e Noveas (parroquia de Nocedo)

Superficie: 59 ha aproximadamente en conxunto.

Estremas:

Norte: Benito Feijóo, Camilo Lorenzo, Claudina Santos, José Castro, e outros propietarios.



Sur: Término municipal de Baltar e monte veciñal en man común denominado "De Tejones" dos veciños de Tixós, do Concello de Baltar.

Leste: José Moure, José Parada, José López, e outros propietarios.

Oeste: Isidro López, Emilio Cantarilla, Benito Cuquejo, e outros propietarios.

Segundo.- *Que se proceda á exclusión do citado monte de calquera inventario, catálogo ou rexistro público no que poidan figurar inscritos a favor de persoa ou entidade distinta á que agora se asigna a súa pertenza.*

Notifíquese esta resolución ó sr. alcalde-presidente do Concello dos Blancos, ós representantes da comunidade veciñal, ó sr. xefe do Servizo de Montes e Industrias Forestais, ós que se lles fará saber que esta resolución, que pon fin a via administrativa, pode ser obxecto de recurso de reposición potestativo perante o Xurado Provincial de Clasificación de Montes Veciñais en Man Común de Ourense, no prazo dun mes, ou recurso contencioso-administrativo perante o Xulgado do Contencioso-Administrativo de Ourense no prazo de dous meses, ámbolos dous prazos a partir do día seguinte ó da publicación no Diario Oficial de Galicia (artigos 109 e 116 da Lei 30/1992, do Réxime xurídico das Administracións Públicas e do Procedemento Administrativo Común, modificada pola Lei 4/1999, e artigos 8 e 46 da Lei 29/1998, do 13 de xullo, reguladora da xurisdicción contencioso-administrativa).



